



Tusagassiorfinnut Nalunaarut

Meeqqat illersuisuat meeqqat inuusuttullu tarnikkut ingerlanerliortut ikiorneqartannginnerat pillugu : *“Ajornerpaamik pisoqassappat imminut toqunnergik kinguneqarsinnaavoq”.*

Niviarsiaraq inuusuttoq MIO-mut saaffiginnippoq. Qatanngutiminut arnamut angajuvoq, qatanngutaa kinguaassiutitigut atornerlugaasimavoq. Kinguaassiutitigut atornerlugaaneq unnerluutigineqareermat utaqqisimanertik pillugu angajua imatut oqaluttuarpoq:

“Ullorpassuarni aamma qaammatini arlalinni utaqqisimavugut kommunemi oqaloqatiginninniarluta. Kiisa novemberi aallartippoq, sulilu susoqarsimanani! Novemberip qeqqata missaani kommuni sianerfigivaatigut oqarlunilu, sapaatip akunnerata ingerlanerani oqaloqatiginninniarlutik aggerumaarlutik. Kiisalu tassa tallimangorneq tikipparput, attaveqarfigineqarnata. Weekend taanna sakkortoqaaq. Annaavarput – qatanngutigaa imminut toquppoq.”

MIO-mut saaffiginninneq meeqqamut ataatsimut assersuusiorluni takutippaa qanoq pisoqarataarsinnaasoq, meeraq kinguaassiutitigut atornerlunneqarsimatillugu ikiorneqanngippat. Meeqqat Illersuisuat Aviâja Egede Lynge isumatsassimaqaaq, MIO suli pisimasunik assingusunik pisoqarsimatillugu suli saaffigineqartarmat. Tamanna pissutigalugu MIO’p VIVE qinnuvigisimavaa meeqqat inuusuttullu tarnikkut ingerlannerliortut pillugit kommunini pinaveersaarluni iliuserisassanik paasiniaaqqullugit, Naalagaaffiit Peqatigiit meeqqanut isumaqatigiissutaat

aallaavigalugu.

"Ulluinnarni MIO-mut saaffiginnissutaasartut tunngavigalugit nalunngilarput, meeqqat inuusuttullu tarnikkut ingerlanerliortut amerlavallaarsimasut ikiortinnissaminnik amigaarteqartut, naak tamanna atorfissaqartillugulu pisinnaatitaaffigalugu. Tamanna pissutigalugu kissaatigisimavarput ukkatarineqassasoq, meeqqat pisortaniit ikiortittarnerat pivisumik isigalugu qanorpiaq isikkoqarnersoq, paasissutissallu maanna pissarsiarivagut", itisiliilluni oqarpoq.

VIVE´p nalunaarusiaani takuneqarsinnaavoq aporfissarpassuaqarsimasoq meeqqat inuusuttullu tarnikkut ingerlannerliortut pisariaqavissumik ikiortinnissaat qulakkeerniaraanni. Aporfissat makkuupput: Pisortani sullissisunik amigaateqarnek, suliat naammassiniassallugit atorfeqartitanik amigaateqarnek, pisortaniit neqeroorutaasut akunnerminni suleqatigiinnerup unamminarnera kiisalu akimorlugu suleqatigiinnissami politiit, atuarfeqarfiit peqqinnissaqarfiullu akunnerminni unamminartut allat.

Nalunaarusiaq sananeqarsimavoq allaffissornikkut pisortat, pisorta qarfinni suleqataasunut, ilaqutariit Centeriutaat aamma susassaqtartut allat MISI-miit, politiiniit, soqutigisaqatigiit qitiusut aamma Inunnik Isumaginninnikkut Qullersaqarfimmi sulisut apersorlugit.

Nalunaarusiamut ilanngullugu aamma innersuussuteqartoqarpoq. Apersorneqartut ilaatigut kissaatigisimavaat iliuusissatut periarfissaareersut annertusarneqassasut, soorlu Ammasumik Siunnersuineq aamma orniguttarfiit nakussassarneqassasut. Tassunga ilagitillugu aamma apersorneqartuni misigisaasoq tassaavoq, meeqqat inuusuttullu arlaqangaatsiartut aliasunnermik ajornartoorfinnillu misigisaqartarsimaqisut, tamannalu tunngavigalugu kissaatigigaat, meeqqanut inuusuttunullu aliasunnermik ajornartoornermillu misigisaqarnerminni passussisinaanerannut tapersiutaasinnaasunik iliuuseqartoqassasoq, ikiorneqanngippatami kingusinnerusukkut tarnikkut unamminartunik takkussuuttooriaannaassammata – kingunerlutsillutik. Tamakkua saniatigut aamma apersorneqarsimasut kissaatigaat iliuuserisassanik amerlanerusunik peqartariaqartoq, iliuuserisassatullu siunertarineqartut toqqaannartumik meeqqanut inuusuttunullu imminut



toqoqqajaasunut sammineqassasut, tamatumuuna immikkut ittumik inuusuttunut neqeroortoqassasoq, imminut toqoqqajaanermik eqaarsaateqarsimassappata.

”Meeqqanut inuusutunullu ajoqusersimasut ikiorserneqarnissaannut naalakkersuinikkut tulleriiaarinikkut inissiisoqartariaqalerpoq, tamannalu massakkut aaqqittariaqarpoq”, Meeqqat Illersuisuat oqarpoq nangeqqillugulu:

” Pisortani sullissisunik amigaaqarneq, pisortani akisussaasut suleqatigiinniarnerminni ajornartorsiornerat aamma aningaasassaaleqillutik amigartoornerat soorunami nassuiaataalluarsinnaapput, suna pillugu meeqqat ajornartorsiorlutillutik pisortanit ikiorserneqannginnersut. Kisianni siniffiup akisaanut innaannarnissamik susoqannginnissaannut imaluunniit utoqqatsissutigissallugu iliuuseqartoqannginneranut patsisigineqanngisaannassaaq. Pisortat suliniutaat nakussassarlugit aatsaat taamak pisariaqartigilerpoq, meeqqammi ilaqutariillu pisortaniit ikiorserneqarlutik suliniutigineqarnerat aatsaat taamak pisariaqartigilerpoq, taamaammat Kommunit Namminersorlutillu Oqartussat suli annertunerujussuarmik innuttaasunut nalunaaruteqartariaqalerput, sumi aamma qanoq ililluni meeqqat, inuusuttut ilaqutariillu ikiorserneqarsinnaanersut”, Meeqqat Illersuisuat naggasiivoq.

Asannittumik inuulluaqqusillunga

Aviâja Egede Lyng

Meeqqat Illersuisuat

Børnetalsmand

Avi@mio.gl

Tlf.: 531274